



L amor dl'oma



Idiom: Gherdëina
Meludia: Trad. Nghiltiera
Paroles: Franz Moroder

Cie iel che sun chësc mond lieia l cuer
l plu santamënter, dl rich y dl puer',
che bele al nascer cun gaudio nes saluda,
che dura fin che la mort nes spartësc y dut muda?
L miëur sun chësc mond, che dal ciel nes po' unì dat,
la majera benedescion ch' l die nes à fat,
l plu amabil, l plu vëira, l plu che dura:
l ie l amor dl'oma y si cura.

Tan de mei bel' dan nosc nascer, y po' ce bria
pra la cuna, di y nuet ne lascela do nia,
ce lëur a nes cuntenté, ce tēma, ce cura.
Dut suportela cun pazienza zënza misura.
La rij cun neus, y a cuer 'i va duc nosc mei,
y ce festide, ce duel, canche son amalei.
Mei n'ala fat assé y pra nēus stala for,
mei ne se stancia dl'oma l gran amor.

Y po' che son plu granc y chersciui su,
che l mond manacia nosta giuventù,
sciche la se prova cun bon nseniamënc,
che restonse dalonc dal mel y biei valënc.
Tl pericul nosta miëur custodia sarà
ch'la paroles d'amunizion y d'aurità,
che dut a bones y tan de cuer rejona

plën de tëma l amor de na bon' oma.

Y canche cun i ani nce per nëus vën l tëmp,
che se njenion cumpania y tel pitla jënt,
che tan nes sta a cuer, y ch' i ulon tan bon,
mé per nosta familia nëus se festidion,
uniun a sé pënsa y per i siei cialerà,
dl fra, dla sor, dl amich l amor passerà;
ma sce duc t'ëss' desmincià y t'ëss' tralascià:
no mei, mei l amor dl'oma ne sarà finà.